

D'n Ingelbewaarder.

**Hae geit altied mit ós mit,
Ze zègke, det d'r op oze sjouwer zit.
En waal ane rechter kantj,
Hae haet mit ós 'ne speciale bandj.**



**Dae lènks oppe sjouwer zit,
Dao haet d'r get mit.
Ómdet 't 'ne rubel is,
Of messjien waal de duvel is.**

**Hae is gestuurdj door de vader,
Vreuger zag m'n: es ingelbewaarder.
Doe kóns h'm gaar neet zeen,
Haet geine kop, vingers of teen.**

**Es se 't meujelik höbs,
En mit dien zieël ónger de erm löps,
Den stuit d'r vöör dich klaor,
Geluif mich mer, 't is waor!**

**Deje w'r get kwaod
Den kós d'r sjrieëve: "Laot!"
Want ze mótte zich äöver ós óntferme,
Ós, es 't ware, besjerme.**

**Ós biestaon in noad,
Ós begeleie tót de doad.
Zeen 't dames of hieëre?
Waat maak 't oet: Haoj ze in ieëre!**

**Ze zulle ós goje raod gaeve
Es se keuzes móts make in dien laeve.
En det waal hónderd kieëre.
Loestere nao hun: det mótte w'r lieëre.**

**Ich herinner mich
'n Lank gedich.
Dao in woor sprake,
Van 14 van die snake.**



**Es weer nao bèd gaon,
Zoewe die naeve ós staon.
En haoje troew de wach
En besjerme ós de ganse nach.**

**Twieë, hieël zeut,
Zote bie ós veut.
Ane rechterkantj,
Hele ze ós vas bie de handj.**

**Nog twieë d'rbie,
Aan oos lènker zie.
En...en... nog vääöl mieë,
Bie oze kop zote d'r ouch nog twieë.**

**Die zote nao ós te wènke,
Ich mó't d'r neet aan dènke.
Doe höbs gein röstig moment
Inne tent.**

**Pap en mam mer haope,
Dets se gaw gings slaope.
O. L. Hieër haet zich get bedach,
Of woor 't de kirk die zag:**

**“Groat of klein,
Doe bös noatj allein.
Stiekem moog neet bate,
Weer haoje dich inne gate.”**

**Oktoaber 2010
Pitje van de Meister.**
